



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

Nr. 944 / Prot.
3

Tiranë, më 21 .09.2016

VENDIM

Nr. 65 ,datë 21.9/2016

Në mbështetje të nenit 23 të Kushtetutës së Republikës së Shqipërisë, pikës 3 dhe 5 të nenit 24, të ligjit nr. 119/2014 “Për të drejtën e Informimit”, shkronjës a) të nenit 31/1 të ligjit nr. 9887 datë 10.03.2008 “Për mbrojtjen e të dhënave personale” i ndryshuar, ligjin nr.10279, datë 20.05.2010 “Për kundërvajtjet administrative”, Komisioneri për të Drejtën e Informimit dhe Mbrojtjen e të Dhënave Personale,

V Ë R E N:

Ankuesi/ Qendra “BIRN Albania”, përfaqësuar nga Z. _____, ka depozituar pranë Zyrës së Komisionerit ankesën nr. 944 datë 09.09.2016 me objekt, “Ankim për refuzimin ndaj dhënies së informacionit dhe kopje të dokumenteve zyrtare”, ndaj autoritetit publik/Autoriteti Kombëtar i Ushqimit.

Qendra “BIRN Albania” në cilësinë e kërkuessit me shkresën datë 27.07.2016, ka kërkuar t’i vihet në dispozicion dokumentacioni si më poshtë:

1. *Masat administrative ndëshkuese me gjobë të marra nga AKU gjatë viteve 2014, 2015 dhe 2016, ndaj subjekteve të ndryshme për “mungesë dokumentacioni shoqëruar të produkteve ushqimore”. Informacioni të përfshijë emrin e subjektit, datën e masës, arsyen e marrjes së masës administrative, vlerën e gjobës dhe statusin e arkëtimit të saj.*
2. *Numrin total dhe vlerën e masave administrative të marra nga AKU ndaj subjekteve restorante dhe “fast food”, për tregtim të produkteve ushqimore jashtë standardeve të lejuara në vitet 2014, 2015 dhe 2016.*

Ankuesi pretendon se është cënuar në të drejtën për informim, pasi nuk është informuar lidhur me sa ka kërkuar dhe për këtë arsye ka depozituar ankim pranë Zyrës së Komisionerit.

Në ndjekje të procedurës për shqyrtimin administrativ të çështjes, Komisioneri pas vlerësimit të ankesës, me urdhrin nr. 196 Prot, datë 19.09.2016, ka urdhëruar kryerjen e inspektimit administrativ pranë Autoritetit Publik/ Autoriteti Kombëtar i Ushqimit.

Pasi u depozitua Urdhri i inspektimit administrativ Nr.196, datë 19.09.2016 dhe u protokollua me nr. 3832 Prot., datë 20.09.2016, u kontaktua me punonjësen e protokollit, e cila na informoi se kërkesa e Qendrës “Birn Albania” është regjistruar pranë Autoritetit Kombëtar të Ushqimit, me nr.3185 Prot., datë 29.07.2016.

Në regjistrin e protokollit të institucionit nuk rezultonte përgjigje e kthyer për kërkesën e Qendrës "Birn Albania" të datës 27.07.2016. Gjithashtu u provua se titullari i Autoritetit Publik, ka sigluar kërkesën për ndjekje Z. , Drejtor i Drejtorisë së Menaxhimit të Riskut dhe Koordinimit të Inspektimeve.

Pasi u provua se kërkesa ishte administruar prej tij, Z. na informoi se dokumentacioni i kërkuar nga Qendra "Birn Albania" përbën informacion publik në kuptim të pikës 2, të nenit 2, të Ligjit 119/2014 "Për të drejtën e informimit". Gjithashtu sqaroi se ka urdhëruar kthimin e përgjigjes, Znj. dhe Z. . Grupi i inspektimit verifikoi faktet e mësipërme edhe nga regjistri i protokollit të brendshëm të kësaj drejtorie. Pas parashtrimeve të fakteve, u përpilua procesverbali i cili u firmos pa vërejtje nga Drejtori i Menaxhimit të Riskut dhe Koordinimit të Inspektimeve, Z. .

Pas shqyrtimit të ankesës, inspektimit, si dhe pas konsultimit të legjislacionit përkatës rezulton se, informacioni i kërkuar nga Qendra "Birn Albania", përbën informacion publik. Në kuptim të pikës 2, të nenit 2, të Ligjit nr.119/2014 "Për të drejtën e informimit", "*informacion publik konsiderohet çdo e dhënë e regjistruar në çfarëdo lloj forme dhe formati, gjatë ushtrimit të funksionit publik pavarësisht nëse është përpiluar ose jo nga Autoriteti Publik*".

Pas shqyrtimit në tërësi të provave të administruara, Komisioneri konstaton se shkelja e kryer është mos trajtimi i kërkesës brenda afatit të parashikuar në ligj, e provuar kjo jo vetëm nga pretendimet e ankuesit në ankesë por edhe nga konstatimi i grupit të inspektimit në zyrat e Autoritetit Publik/ Autoriteti Kombëtar i Ushqimit.

Bazuar në pikën 4 të nenit 15 të këtij ligji mos trajtimi i kërkesës konsiderohet "*refuzim*".

Bazuar në shkronjën "a" të pikës 2 të nenit 18 të ligjit nr.119/2014 "Për të drejtën e informimit", "*Refuzimi i dhënies së informacionit, në kundërshtim me parashikimet e këtij ligji, dënohet me 150 000 deri në 300 000 lekë*".

Në zbatim të pikës 4 të nenit 19, përgjegjësia për këtë kundërvajtje administrative është e nëpunësit i cili ka përgjegjësi administrative për moszbardhjen e dokumenteve me qëllim pengimin e ushtrimit të së drejtës për informim, në rastin konkret Znj. dhe Z.

Në këto kushte, kur provohet mos trajtimi i kërkesës brenda afatit të parashikuar në ligj, ky mosveprim konsiderohet kundërvajtje administrative dhe në bazë të nenit 18 pika 2 gërma "a" sanksionohet me gjobë.

PËR KËTO ARSYE

Bazuar në shkronjën a) të pikës 2 të nenit 18, pikën 3 të nenit 18, pikën 4 të nenit 19, pikat 1 dhe 2 të nenit 21, nenin 22, shkronjat b) dhe ç) të pikës 5 të nenit 24 të ligjit nr. 119/2014 "Për të drejtën e informimit", ligjin nr.10279, datë 20.05.2010 "Për kundërvajtjet administrative", shkronjën a) të pikës 1 të nenit 18 të ligjit nr 49/2012 'Për organizimin dhe funksionimin e gjykatave administrative dhe gjykimin e mosmarrëveshjeve administrative',

V E N D O S A:

1. Pranimin e ankesës së Qendra "BIRN Albania", nr. 944 datë 9.09.2016 kundër autoritetit publik/ Autoriteti Kombëtar i Ushqimit, me objekt "*Ankim ndaj refuzimit për dhënie të informacionit dhe kopje të dokumenteve zyrtare*".
2. Urdhërimin e autoritetit publik/ Autoriteti Kombëtar i Ushqimit, për vënien në dispozicion

ankuesit, të dokumentacionit lidhur me *masat administrative ndëshkuese me gjobë të marra nga AKU gjatë viteve 2014, 2015 dhe 2016, ndaj subjekteve të ndryshme për "mungesë dokumentacioni shoqëruar të produkteve ushqimore"*. Informacioni të përfshijë emrin e subjektit, datën e masës, arsyen e marrjes së masës administrative, vlerën e gjobës dhe statusin e arkëtimit të saj si dhe numrin total dhe vlerën e masave administrative të marra nga AKU ndaj subjekteve restorante dhe "fast food", për tregtim të produkteve ushqimore jashtë standarteve të lejuara në vitet 2014, 2015 dhe 2016.

3. Dënimin e Znj. me gjobë në vlerën 150.000 (një qind e pesëdhjetë mijë) lekë për shkelje të detyrimit të përcaktuar në nenin 19, 4 . Masa e dënimin me gjobë, shlyhet me këste mujore. Gjoha ekzekutohet nga zyra e financës së Autoritetit Kombëtar të Ushqimit brenda 6 muajve nga data e njoftimit të vendimit.

4. Dënimin e Z. me gjobë në vlerën 150.000 (një qind e pesëdhjetë mijë) lekë për shkelje të detyrimit të përcaktuar në nenin 19, 4 . Masa e dënimin me gjobë, shlyhet me këste mujore. Gjoha ekzekutohet nga zyra e financës së Autoritetit Kombëtar të Ushqimit brenda 6 muajve nga data e njoftimit të vendimit.

5. Kundër vendimmarrjes në pikat 1 dhe 2, palët kanë të drejtën e ankimit brenda 45 ditëve në Gjykatën Administrative Tiranë, në përputhje me nenin 25 të ligjit nr.119/2014 "Për të drejtën e informimit".

6. Kundër vendimmarrjes në pikën 3 dhe 4, personi ndaj të cilit është vendosur sanksioni administrativ ka të drejtë brenda 30 ditëve kalendarike nga data e marrjes së njoftimit të vendimit të bëjë ankim në Gjykatën Administrative Tiranë, në përputhje me nenin 22 të ligjit nr.119/2014 "Për të drejtën e informimit".

7. Ky vendim u dha sot në datë 21.09.2016.

Besnik DERVISHI

KOMISIONERI

